



Dette er den originale versjonen av «Mona Lisa» som heng i Louvre i Paris. Foto: EPA / Yoan Valat.

Verdas mest kjende «Mona Lisa»-kopi skal seljast

Ein kopi av måleriet «Mona Lisa», som eigaren påstod var originalmåleriet, skal auksjonerast bort i Paris denne veka.

Måleriet er kjent som «Mona Lisa Hekking», oppkalla etter kunsthandlaren Raymond Hekking. Han heldt til sør i Frankrike og kjøpte måleriet i Nice. I 1960-åra lukkast han med å overtyde fleire kunsthistorikarar og journalistar om at dette var originalversjonen, medan den versjonen som heng i Louvre-museet i Paris, var falsk.

Italienaren Vincenzo Perugia stal den originale «Mona Lisa» frå Louvre i 1911, men måleriet fann vegen tilbake til museet tre år seinare. Hekking påstod at det var feil måleri som kom tilbake til Louvre.

Vil selje måleriet

Då Hekking døydde i 1977, arva familien hans måleriet, og dei har no bestemt seg for å selje det.

Auksjonshuset Christie's skal selje måleriet. Kvaliteten og den uvanlege historia er det som skil måleriet frå andre versjonar av «Mona Lisa», som er eit av dei mest kopierte måleria i verda.

Dette måleriet og historia om det illustrerer kor fascinerande «Mona Lisa» alltid har vore, skriv auksjonshuset på nettsida si. Dei trur at måleriet kjem til å bli selt for mellom to og tre millionar kroner.

Gåtefullt smil

«Mona Lisa» er eit 77 × 53 cm stort portrett i oljefargar, måla av den italienske kunstnaren Leonardo da Vinci. Portrettet er av ei ung kvinne med eit gåtefullt smil.

Det har vore lansert ei rad ulike forklaringar på kvifor ho smiler på dette viset, for eksempel at det har å gjere med at ho var sjukleg, eller at ho berre var lukkeleg og avslappa. Måleriet er eigd av den franske staten og stilt ut i Musée du Louvre i Paris.

Allereie frå fyrste stund blei det sett stor pris på dette måleriet i kunstnarkrinsar, og mange kunstnarar såg på det som eit forbilde for korleis eit portrett skulle målast.

LEONARDO DA VINCI

(15. april 1452 – 2. mai 1519)

- Leonardo da Vinci er eit av dei mest kjende og allsidige genia i verda.
- Han markerte seg mellom anna som ingeniør, målar, bildehoggar, musikalr, arkitekt, zoolog, filosof og astronom.
- Han blei fødd i småbyen Vinci i Toscana nær Firenze i Italia.

(Kjelde:
Wikipedia)